



Slijeđenjem kur'anskih poruka do najviših stepena Dženneta (Meka)

Hatib: dr. Usama ibn Abdullah Hajjat

29. zul-hidže 1443. po Hidžri / 29. juli 2022.

Hvala Allahu Koji je Džennetul-firdevs učinio staništem bogobojažnih i olakšao im puteve koji vode do njega. Zahvaljujem Mu i svjedočim da nema boga osim Allaha, jedinog, Koji nema druga, i Koji je svojim robovima u Džennetu pripremio vječni užitek, koji oni ni za što ne bi zamijenili, i svjedočim da je naš prvak i vjerovjesnik Muhammed, sallallahu alejhi ve sellem, koji je pozivao na Pravi put riječju i djelom. Allahu moj, blagoslovi, smiluj se i spasi Svoga poslanika Muhammeda, sallallahu alejhi ve sellem, i njegovu porodicu i ashabe.

Bojte se Allaha, o ljudi, i pripremite najbolju poputninu za Dan povratka Allahu. Sretan je onaj ko od dunjalučkih dobara pripremi sebi opskrbu za ahireta, boji se svoga Gospodara i slijedi put svakog poniznog Allahovog roba. Uzvišeni kaže: "O vjernici, Allaha se bojte, i neka svaki čovjek gleda šta je za sutra pripremio i Allaha se bojte jer On dobro zna šta radite." (El-Hašr, 18)

Uzmite pouku iz brzog prolaska dana i godina i znajte da je vrijeme riznica i neka svaki čovjek pogleda šta stavlja u svoju riznicu bez koje mu nema spasa u danu u kojem će se pogledi ukočiti i kada će ljudi pred Gospodarom stajati.

O muslimani, zaista je slijeđenje kur'anskih preporuka, prihvatanje njegovih savjeta i opomena put razumom obdarenih, oni tim putem žele doći do ostvarenja svojih želja i ambicija na ovom prolaznom svijetu i Allahovog zadovoljstva i najviših stepeni Dženneta na budućem svijetu. Primjeri koji se navode u Kur'anu i sunnetu imaju za cilj približavanje značenja i pojašnjavanje suštine, kako bi ljudi lakše prihvatili istinu, vjerovali u nju i u potpunosti joj se predali. Jedan od tih primjera je upotreba vještine





dojmljivog govora, koji je Allah, džellešānuhu, preporučio Svome Vjerovjesniku, rekavši: "i reci im o njima ono što će ih dirnuti" (En-Nisa, 63).

Kako bi ljudima približio i dočarao suštinu dunjaluka, zavedenost ljudi njegovim ukrasima, Poslanik, sallallahu alejhi ve sellem, rekao je: "Zaista je ovaj dunjaluk sladak i privlačan, i Allah vas je nastanio na njemu da bi vidio kako ćete postupati." (Muslim i Nesai)

Nema sumnje da slast i ljepota imaju svoje mjesto u ljudskoj duši, daju joj smiraj i radost, i zbog toga je njena pažnja stalno usmjerena prema njima. U pogledu te pažnje ljudi se dijele u dvije skupine: prva skupina su razumom obdareni, koje je Allah uputio, i koji slijede najispravniji put i imaju najuzvišeniji cilj, oni znaju da, iako im je dozvoljeno da uzmu svoj udio na ovom svijetu i uživaju u dunjalučkim užicima, ipak moraju biti oprezni da ih ti užici, svojom privlačnošću i ljepotom, ne odvrate od vječnog i neprolaznog užitka, koji je Allah pripremio za Svoje dobre robove i o kojem nas je obavijestio u Svojim Knjizi: "One koji budu vjerovali i dobra djela činili – Mi doista nećemo dopustiti da propadne nagrada onome koji je dobra djela činio – čekaju sigurno edenski vrtovi, kroz koje rijeke teku, u njima će se narukvicama od zlata kititi i u zelena odijela od dibe i kadife oblačiti, na divanima će u njima naslonjeni biti. Divne li nagrade i krasna li boravišta!" (El-Kehf, 30–31), i o kojem nas je obavijestio Njegov Vjerovjesnik, sallallahu alejhi ve sellem, u hadisu koji su zabilježili Buhari i Muslim, od Ebu Hurejre, radijallahu anhu, kada je rekao: "Rekao je Uzvišeni: 'Pripremio sam Svojim dobrim robovima (u Džennetu) ono što oko vidjelo nije, i što uho čulo nije i što ljudskom srcu nije naumpalo. Čitajte ako želite: 'I niko ne zna kakve ih, kao nagrada za ono što su činili, skrivene radosti čekaju' (Es-Sedžda, 17).'"

Vječito uživanje Uzvišeni je opisao i riječima: "Kada stanovnici Dženneta uđu u Džennet, reći će glasnik: 'Vaše je da budete zdravi, i da se nikada ne razbolite, i da vječno živite i nikada ne umrete, i da uživate i nikada ne osjetite nikakvu nelagodu'", a to su riječi Uzvišenog: "... i njima će se doviknuti: 'Taj Džennet ste u nasljedstvo dobili za ono što ste činili!' (El-A'raf, 43)." (Muslim i Tirmizi od Ebu Seida el-Hudrija)





Uzvišeni je pojasnio njegovu veličinu i prednost u odnosu na svaki užitak na ovome svijetu u hadisu koji je zabilježio imam Buhari od Ebu Hurejre, radijallahu anhu, a u kojem se navodi da je Allahov Poslanik, sallallahu alejhi ve sellem, rekao: "Prostor koji zauzima vaš luk u Džennetu bolji je od prostora na kojem izlazi i zalazi sunce – od cijelog dunjaluka." U Buharijevom Sahihu od Sehla ibn Sa'da es-Saidija, radijallahu anhu, prenosi se da je Allahov Poslanik, sallallahu alejhi ve sellem, rekao: "Prostor koji zauzima bič u Džennetu bolji je od dunjaluka i svega što je na njemu."

O vjernici, to je užitak kojem nema ravnog, a kamoli da ima većeg i boljeg užitka, i zbog toga se ne treba čuditi da vjernici imaju udjela u svakoj vrsti dobra: izvršavanju naredbi svoga Gospodara, obavljanju farzova, ostavljanju harama, približavanju Njemu činjenjem dobrovoljnih ibadeta (nafila), predanosti svemu što je korisno i što trajno ostaje i odbacivanju svega što je štetno i beskorisno, s ubjeđenjem da će plodove dobrih djela, koja čine kako bi postigli zadovoljstvo svoga Gospodara, ubrati na budućem svijetu, imajući na umu riječi svoga Sveznajućeg Gospodara: "Onome ko bude želio nagradu na onom svijetu – umnogostručit ćemo mu je" (Eš-Šura, 20); "A onaj ko želi onaj svijet i trudi se da ga zasluži, a vjernik je, trud će mu hvale vrijedan biti" (El-Isra, 19).

Ovakvim ispravnim stavom i slijedenjem Pravog puta oni su postali najbolji primjer u izvršenju božanske plemenite zapovijesti: "... i nastoj da time što ti je Allah dao stekneš onaj svijet, a ne zaboravi ni svoj udio na ovome svijetu i čini drugima dobro, kao što je Allah tebi dobro učinio, i ne čini nered po Zemlji, jer Allah ne voli one koji nered čine" (El-Kasas, 77).

Oni su učinili veliko dobro i uslugu samima sebi time što su ovaj svijet uzeli kao stepenice i put koji će ih odvesti do Allahovog zadovoljstva i do vječnog Dženneta i time su pokazali da su najmudriji i najpametniji ljudi i najplemenitiji kod Allaha, džellešanuhu. Nasuprot njih su oni čija je srca Allah učinio nemarnim prema Njegovom spominjaju, i koji su slijedili svoje prohtjeve i sami sebe upropastili. Oni su se priklonili putu zablude, ostavili Pravi put, zanemarili farzove, činili ono što je Allah zabranio, hranili se haram imetkom, darežljivost su zamijenili pohlepom i





sebičnošću, pokidali su sve veze i prekinuli sve puteve koji ih vode Gospodaru, ovosvjetski užici postali su njihov najveći cilj, želja i briga i vrhunac njihovog znanja, skupljali su dunjaluk radi dunjaluka, a zaboravili su na ahiret i njegove velike nagrade, pa je i njihova "nagrada" u skladu s tim: "Onome ko želi ovaj svijet, Mi mu brzo dajemo što hoćemo i kome hoćemo, ali ćemo mu poslije Džehennem pripremiti, u kome će se osramoćen i odbačen peći" (El-Isra, 18).

Zaslužili su svaki Allahov prijekor i ispunjenje Njegove prijetnje nad njima: "Zaokuplja vas nastojanje da što imućniji budete sve dok grobove ne naselite. A ne valja tako, saznat ćete svakako! I još jednom, ne valja tako! Saznat ćete sigurno! Ne valja tako, neka znate pouzdano, Džehennem ćete vidjeti jasno! I još jednom, doista ćete ga vidjeti očigledno! Zatim ćete toga dana za sladak život biti pitani sigurno!" (Et-Tekasur, 1–8)

Bojte se Allaha i budite s onima koji nastoje da onim što im je Allah dao steknu onaj svijet, a ne zaboravljaju ni svoj udio na ovom svijetu, jer "njima je Allah na Pravi put ukazao i oni su pametni" (Ez-Zumer, 18).

Neka vas ovaj svijet ne obmane svojim ukrasima i ljepotama, vaš Gospodar vam je u potpunosti pojasnio njegovu stvarnost i suštinu, pa je rekao: "Znajte da život na ovome svijetu nije ništa drugo do igra, i razonoda, i uljepšavanje, i međusobno hvalisanje i nadmetanje imecima i brojem djece! Primjer za to je bilje čiji rast poslije kiše oduševljava nevjernike, ono zatim buja, ali ga poslije vidiš požutjela, da bi se na kraju skršilo. A na onome svijetu je teška patnja i Allahov oprost i zadovoljstvo; život na ovome svijetu samo je varljivo naslađivanje" (El-Hadid, 20).

O vjernici, u hadisu koji su zabilježili imam Muslim i Tirmizi od Adullaha ibn Amra ibn El-Asa, radijallahu anhu, prenosi se da je čuo Allahovog Poslanika, sallallahu alejhi ve selleme, da kaže: "Uspio je onaj ko se preda Allahu, i bude mu data opskrba koja mu je dovoljna i Allah učini njegovo srce zadovoljnim onim što mu je dao." U hadisu koji su zabilježili Buhari i Muslim od Ebu Hurejre, radijallahu anhu, prenosi se da je rekao: "Čuo sam Allahovog Poslanika, sallallahu alejhi ve sellem, da kaže: 'Gospodaru moj, podari Muhammedovoj porodici onoliko koliko je dovoljno da se





prehrane", a u jednoj od verzija kaže se: "onoliko koliko im je dovoljno". Kako je samo veličanstvena i mudra ova Poslanikova poruka, i kako je samo lijep završetak onih koji je budu slijedili. Ona nas uči da slijedimo put zadovoljstva koje umiruje ljudsku dušu i srce, i uljepšava život, jer ovaj svijet samo je usputna stanica sa koje će čovjek ponijeti samo ono što je pripremio za onaj svijet.

Bojte se Allaha i neka slijeđenje ovakvog stava u pogledu dunjaluka i ahireta bude najbolje što ste pripremili na putu ka Allahu i drugom svijetu, i samo tako ćete biti od spašenih i onih koji su zaslužili oprost Gospodara i Džennet koji je prostran koliko nebesa i Zemlja i pripremljen za one koji se Allaha boje.

Sjećajte se uvijek da vam je Allah naredio da donosite salavate i selame na najbolje stvorenje, pa je rekao u najistinitijem i najljepšem govoru: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

